

սաստիկ վախեցայ, կարծում էի, թե կորաւ նա: Բայց քանի ընտոյ կրկին յայտնուեցաւ նա եւ սկսեց լողալ դէպի կղզին, իր ետեւից քարշ տալով նաւակը:

Ասլանը շոարած մնաց:

Կղզին այժմ պարզ երեւում էր: Մառախուղի միջից, ես նշմարում էի արեղաների մռայլ կերպարանքները, որոնք, ափի մօտ կանգնած, իրանց ջերմեռանդ, աղերսաւոր ձեռքերը տարածել էին դէպի երկինքը:

Մի քանի անգամ ալիքները այնպէս սաստկութեամբ անցան նաւակի վրայից, որ փոքր էր մնում, մի թեթեւ փետուրի նման, մեզ ողողէին եւ իրանց հետ տանէին: Ես բնագղմամբ բռնեցի դրօշակի թոյլ ձողից: Ասլանը ծիծաղեց:

— Մի վախիր, — ասաց նա, — կղզին մօտ է:

— Բերզէն-օղլու ջանքերն իզուր անցան, — յանկարծ խօսքը փոխեց նա, եւ մի անսովոր անհանգստութիւն երեւաց նրա դէմքի վրայ: — Պարանը կտրոտեցաւ...

Այնուհետեւ ի՞նչ պատահեց, ի՞նչ կատարուեցաւ մեզ հետ, ես մինչեւ այսօր էլ չեմ կարողացել ճիշտ կերպով պատկերացնել իմ մտքում: Այսքանը միայն աղօտ կերպով յիշում եմ, որ կոհակները կրկին բարձրացան, եւ ես, ինչպէս երազի մէջ, զգացի, որ նաւակը այլեւս իմ ոտների տակին չէր. ես ընկղմուած էի ջրի մէջ, մրկածուփ ալիքները խաղացնում էին ինձ, երբեմն դէպի յատակը տանելով, երբեմն դէպի վեր բարձրացնելով, եւ այդ ժամանակ, կարծես մի աներեւոյթ զօրութիւն ինձ պինդ բռնած ուներ: Երկար մենք տարուբերում էինք ջրային տարերքի մէջ, բայց զօրութիւնը ինձանից չէր բաժանում:

Այդ զօրութիւնը ինձ դուրս հանեց կղզու վրայ, բոլորովին անզգայացած եւ կիսաշունչ դրութեան մէջ: Եւ դա ուրիշ ոչ ոք չէր, բայց միայն իմ ազատիչը, իմ բարեկամը՝ Ասլանը: Երբ աչքերս բաց արի, երբ փոքր-ինչ ուշքի եկայ, ինձ մի խումբ արեղաներից շրջապատուած գտայ: Նրանք անդադար փառք էին տալիս աստծուն, որ ազատուեցանք:

## ԺԱ. ԿՏՈՒՅ ԱՆԱՊԱՏ

Արեղաները մեզ տարան իրանց վանքը եւ հանգստացրին: Խուցերից ամենայարմարը պատրաստեցին մեզ համար, իսկոյն կրակ վառեցին, տաքացանք եւ սկսեցինք բուխարու առջեւ մեր հագուստները չորացնել: Բեր-